



Na osnovu člana 22 Statuta Brčko distrikta BiH - prečišćeni tekst (Službeni glasnik Brčko distrikta BiH, broj 2/10), člana 3 Zakona o javnim preduzećima u Brčko distriktu BiH - prečišćeni tekst (Službeni glasnik Brčko distrikta BiH, broj: 22/18 prečišćeni tekst i broj 5/20), člana 15a stava 2 Zakona o putevima Brčko distrikta BiH – prečišćeni tekst (Službeni glasnik Brčko distrikta BiH, broj 22/18), člana 64 Poslovnika o radu Skupštine Brčko distrikta BiH (Službeni glasnik Brčko distrikta BiH, brojevi 54/18 – prečišćeni tekst, 17/20 i 24/20) i Prijedloga Odluke JP "Putevi Brčko" d.o.o. Brčko distrikt BiH broj predmeta: 01-520/21 od 3. 2. 2021. godine, Skupština Brčko distrikta BiH na 3. redovnoj sjednici održanoj 24. februara 2021. godine, donosi

O D L U K U

O POVJERAVANJU IZGRADNJE MOSTA BRČKO /GUNJA PREKO KORITA RIJEKE SAVE JAVNOM PREDUZEĆU „PUTEVI BRČKO“ D.O.O. BRČKO DISTRIKT BiH

Član 1

Javnom preduzeću „Putevi Brčko“ d.o.o. Brčko distrikt BiH (u daljem tekstu: Preduzeće), povjerava se izgradnja mosta Brčko/Gunja, preko korita rijeke Save (u daljem tekstu: Most), kao i sprovođenje svih potrebnih postupaka izrade potrebnih studija, projektne i tehničke dokumentacije, pribavljanje raznih dozvola i saglasnosti, a sve u skladu s mjerodavnim propisima koji su na snazi u Bosni i Hercegovini, Republici Hrvatskoj i Brčko distriktu BiH.

Član 2

(1)Preduzeće će u saradnji s Vladom Brčko distrikta BiH, kao i drugim nadležnim institucijama osigurati pribavljanje potrebne dokumentacije (dozvola, saglasnosti i sl.) za izvođenje radova povezanih s izgradnjom mosta koji će glasiti na Vladu Brčko distrikta- Odjeljenje za javne poslove.

(2)Potrebno je obezbijediti punu koordinaciju s predstavnicima Republike Hrvatske, po modelu da istu vode i obezbjeđuju nadležna tijela, preduzeća, organi, institucije istog nivoa nadležnosti i odgovornosti.

Član 3

(1)Gradonačelnik Brčko distrikta BiH će imenovati tim za implementaciju, praćenje i vođenje potrebnih aktivnosti i poslova iz člana 1 ove odluke (u daljem tekstu: Tim za implementaciju) u koji će biti imenovana lica u vezi s pojedinim pitanjima vezanim za realizaciju projekta.

(2)Tim za implementaciju će se sastojati od dovoljnog broja članova koji bi svojim djelovanjem pokrili sve potrebne aktivnosti u tehničko-operativnom i stručnom smislu.

(3)Okvirno, sastav tima će se formirati po sljedećem modelu:

- po jedan predstavnik iz vladinih odjeljenja: Odjeljenje za javnu sigurnost, Odjeljenje za javne poslove i Odjeljenje za prostorno planiranje i imovinskopravne poslove,

- predstavnici Preduzeća,
- stručnjak iz oblasti metalnih i betonskih konstrukcija na mostovima,
- stručnjak iz oblasti hidroloških i geotehničkih radova,
- predstavnik Zavoda za planiranje i izgradnju grada.

(4) Ukoliko se ukaže potreba za angažovanjem eksternih stručnjaka u Tim za implementaciju, isti će imati pravo na novčanu naknadu, koja će padati na teret sredstava Preduzeća, a koja će se utvrditi uz saglasnost Upravnog odbora Preduzeća.

(5) Timom za implementaciju rukovodi gradonačelnik Brčko distrikta BiH, a sastanci Tima za implementaciju će se održavati jedanput sedmično.

Član 4

Pored članova tima za implementaciju potrebno je da Vlada Brčko distrikta BiH obezbijedi potrebnu komunikaciju, saradnju i kontakte s imenovanim ovlaštenim predstavnicima država Bosne i Hercegovine i Republike Hrvatske, s obzirom da se radi o izgradnji objekta na državnoj granici, kao i utvrđivanju tačne lokacije novog mosta, s tim što će se iskoristiti postojeća infrastruktura (granični prelaz i sl.), čime bi se smanjili troškovi i ubrzao proces gradnje.

Član 5

(1) Preostali, odnosno neutrošeni iznos sredstava, koji je utvrđen u članu 5 Odluke o povjeravanju vanrednog održavanja/rekonstrukcija mosta Brčko/Gunja na M14.1 BiH/DC 214 RH, preko korita rijeke Save Javnom preduzeću „Putevi Brčko“ d.o.o. Brčko distrikt BiH, broj: 01-02-761/19, od 18. 12. 2019. godine, će se koristiti za finansiranje svih troškova vezanih za izgradnju mosta.

(2) Ukupan potrebni novčani iznos za realizaciju cijelog projekta će se odrediti nakon sprovođenja i okončanja svih potrebnih poslova, procedura, izrade Studija i projektne dokumentacije, te ostalih pratećih troškova, a isti će se obezbijediti iz sredstava Preduzeća ili drugih odgovarajućih izvora, kroz odluke Skupštine Brčko distrikta BiH, uključujući i eventualni iznos koji bi se kroz pregovore na osnovu sporazuma obezbijedio od Republike Hrvatske.

Član 6

U slučaju potrebe za uređenjem okoline mosta na strani Bosne i Hercegovine u pogledu pristupnih saobraćajnica i drugih površina namijenjenih za funkcionisanje graničnog prelaza, daje se saglasnost Preduzeću, da kroz procedure javne nabavke sprovede i takve aktivnosti.

Član 7

Preduzeće će shodno važećim propisima kroz tendersku proceduru sprovesti odabir Izvođača radova, kao i Nadzornog tijela za kontrolu kvaliteta i kvantiteta izvedenih radova na izgradnji novog mosta.

Član 8

(1) Ovako donesena Odluka s ovim sadržajem predstavlja viđenje stvari na dan donošenja iste.

(2) U slučaju nepredviđenih okolnosti, vanrednog stanja, više sile, promjene strategije saobraćaja na državnim nivoima, ili bilo kog drugog opravdanog razloga, novonastala situacija će se razmotriti i biti definisana na izmjenama ili dopunama ove odluke, ili novom odlukom.

Član 9

(1) Ova odluka stupa na snagu prvog narednog dana od dana objavljivanja u Službenom glasniku Brčko distrikta BiH.

(2) Stupanjem na snagu ove odluke, prestaje da važi Odluka o povjeravanju vanrednog održavanja/rekonstrukcija mosta Brčko /Gunja na M14.1 BiH/DC 214 RH, preko korita rijeke Save javnom preduzeću „Putevi Brčko“ d.o.o. Brčko distrikt BiH, broj: 01-02-761/19, od 18. 12. 2019. godine.

Broj: 01-02-1030/21

Brčko, 24. 2. 2021. godine

PREDSJEDNIK
SKUPŠTINE BRČKO DISTRIKTA BiH
Mr. sci. Siniša Milić

Dostavljeno:

1. Predsjedniku
2. Dopredsjedniku
3. Gradonačelniku
4. Odjeljenju za javne poslove
5. JP „Putevi Brčko“ d. o. o.
6. Sektoru za koordinaciju politika i opće poslove
- Odsjeku za opće poslove
7. Arhivi